



KONSELLU KONSULTIVU FUNDU PETROLÍFERU
CONSELHO CONSULTIVO DO FUNDO PETROLÍFERO
CONSULTATIVE COUNCIL OF PETROLEUM FUND
Formosa Street, Po Box 2436 Dili Timor-Leste
Tel/Fax +670 3310585/ 3310569
Mobile: +670 730 4007 & 730 4488

ASUNTU : PARESER KONABA PROPOSTA ORSAMENTO GERAL DO ESTADO 2010

DATA : 6 DE NOVEMBRO DE 2009

REFERENSIA:

1. Lei no 9/2005 de 3 de Agosto, Lei Do Fundu Petrolífero
2. Carta Presidente Komisaun C, Parlamentu Nasional no. Ref. 383/comissão C, Data 19 de Outubro de 2009 konaba Parecer husi KKFP ba OJE 2010

BAZE LEGAL:

Tuir Lei Fundu Petroliferu artigu 30.2 ne'ebe dehan kata:"wainhira Governu apresenta lei ba parlamentu nasional ho vista atu foti osan husi Fundu Petroliferu no bainhira montante osan ba Tinan Fiskal 2010 ne'ebe a'as liu rendimento Sustentavel estimadu, Konsellu Konsultivu Fundu Petroliferu tenki hatama, ho tempu tuir prazu determinadu husi parlamentu nasional ba kazu ida-idak, Parecer ida konaba proposta Governu nian"

Pareseres ne'e sei fahe ba parte rua. Parte ba dahuluk sei koalia konaba preokupasoens no rekomentasoens husi komunidade bazeia kolokiu ne'ebé halao tiha ona ba 12 distritu relasiona ho utilizasaun fundu petrolíferu durante ne'e no parte darua sei koalia konaba opiniaun sira relasiona ho orsamentu jeral estadu 2010.

I. Preokupasoens no Rekomendasoens husi Komunidade

Bazeia ba Lei No. 9/ 2005, 3 de Agustu konabá Lei Fundo Petrolíferu, iha kapitúlu lima 5 artigu 30.4 hateten katak atu fo konsellu ba Parlamentu, Konsellu Konsultivu ba Fundu Petrolíferu sei mos rona opiniaun pública hodi organiza kolokiu anual relasiona ho Fundu Petrolíferu. KKFP halao kolokiu distrital ba administradores Distritus, subdistritus, autoridades lokal, xefi sukus, representante sosiedade civil kompostu hosi NGO's lokal, igreja, organizasaun feto no organizasaun juventude. Husi fulan Marsu-Setembru 2009 KKFP hala'o ona kolokiu anual iha distritu 12 no sei remata iha Dili iha

fulan Novemburu nia laran. Husi kolokiu ne'e partisipante hamutuk 866; feto (102) no mane (764).

KKFP halao kolokiu distrital hodi sosializa filozofia Fundu Petrolíferu, investimentu Fundu Petrolíferu, Alokasaun Orsamentu Jeral Estadu 2009, Atividade Petrolíferu no transparensia ho rona preokupasoens no rekomendasoen husi komunidade. Preokupasoens no rekomendasoen husi komunidade mak hanesan tuir mai ne'e:

1. Partisipasaun Autoridade Lokal Iha Planeamentu no Monitorizasaun Projetu

Autoridade lokal hanesan administradores distritu no sub distritu ho xefi suku lamenta tanba laiha partisipasaun iha prosesu planeamentu ba sira nia distritu rasik, nu'udar exemplu suku balun ne'ebé iha foho leten simu fali trator. Pratika ne'e hatudu katak programa balun ne'ebé tuir lolos diak ba povu maibe la konduz ho povu nia realidade no prioridade.

Tanba, autoridade lokal la partisipa iha prosesu planeamentu, sira rasik la **hatene konaba alokasaun orsamentu jeral estadu**. Iha distirtu barak ne'ebé bainhira KKFP halao kolokiu, foin ba dahuluk autoridade lokal hatene konaba alokasaun orsamentu ba sira nia distritu. Autoridade lokal hatene konaba projeto ne'ebé halao iha sira nia distritu, tanba la **hatene autoridade lokal** rasik laiha knaar monitorizasaun hodi bele kontrola projetu sira iha nivel distritu too suku. Autoridade lokal rasik foin iha koñesimentu bainhira projetu hirak ne'e hetan **problema mak foin mai husu autoridade lokal** atu rezolve. Tuir autoridade lokal katak kuaze projetu hotu determina husi **nasionál no laiha konsiderasaun ba autoridade lokal**. Projetu ne'ebé determina husi nivel nasional halo partisipasaun husi komunidade ba konstrusaun ba projetu hirak ne'e mos sai minimu.

Rekomendasau

- Presiza kria mekanismu diak hodi konsulta ba autoridade lokal, líder komunitariu no representante kompetente sira hodi bele difini didiak prioridade ba sira nia distritu rasik.
- Presiza iha kordenasaun entre autoridade nasional ho distrital no mos ho kompañia sira nebe implementa projetu iha distritu refere.
- Presiza partisipasaun hosi komunidade ba iha projetu kiik sira ne'ebé mak implementa iha sira nia komunidade.

2. Infrastruktura

Projetu infrastrutura nu'udar faktor importante ba dezenvolvimentu nasional, tanba projetu infrastrutura ne'e povu bele hetan benefisiu diretu husi obra da ne'e. Husi kolokiu iha **12** distritu komunidade husu atu governu no parlamentu nasional fo atensaun boot ba estradas nacionais (hanesan husi **Kasa ba Suai**) ne'ebé at la halimar, estrada sub distritu ne'ebé halo ligasaun ba ba distritu no sub-distritu sira seluk no mos dala ba suku. Tuir komunidade

katak ho dalan hirak ne'e mak sei bele fasilita dezenvolvimentu iha sira nia areas tanba fo oportunidade atu iha asesu.

Númeru eskola husi primaria too sekundaria agora aumenta, maibe eskola barak mos seidauk iha kondisaun fizika ne'ebé diak. Komunidade husu atu governu tau matan ba materiais ne'ebé sei falta, be mos ba saneamentu eskola ninian.

Kualidade projeto infrastutura sai nu'udar preokupasaun husi komunidade iha distritu 12. Projeto infrastrutura barak mak laiha kualidade, hanesan exemplu estrada Cova sub distritu Balibo, projeto la konsege ramata tanba osan atu hadiak hotu tiha ona. Maski orsamenta nesesidade povu iha **orsamentu jeral estadu no parlamento nasional aprova osan hirak ne'e maibe** la fo benefisiu ba komunidade iha area ne'eba.

Estudantes ne'ebé partisipa iha kolokiu hirak ne'e mos husu ba governu atu matan ba eletrisidade ne'ebé at beibeik tanba fo **impaktu ba sira nia kualidade** estuda. Estudante barak mak mai husi familia agrikultor, iha loron halao servisu iha toos no natar no iha tempu atu estuda iha kalan.

Rekomendasau

- Eskola sira ne'ebé hadiak tiha ona presiza fo atensaun mos ba kondisaun eskola hanesan be no saneamentu no materiais eskola nian.
- Oinsa governu bele promove atu komunidade ne'ebe uza eletrisidade hahu selu tuir kbiit ne'ebé iha, atu bele mos kontribui ba dezenvolvimentu nasionál
- Hakbiit knaar monitorizasaun husi parte governu nian no mos knaar fiskalizasaun parlamentu nasional ninian hodi haree implementasaun orsamentu jeral estadu liu-liu iha area **infrastrutura ne'ebe povu bele hetan benefisiu deiretu husi projeto hirak ne'e.**
- Presiza desentraliza poder ba governu lokal atu autoridade lokal mos iha kbiit halo monitorizasaun hodi bele garante kualidade projeto.

3. Edukasaun

Realidade hatudu katak estudantes hirak ne'ebé manan bolsa estudu barak liu mai husi eskola sekundaria katoliku. Eskola ne'ebé povu bain-bain nia oan susar atu bele tama tanba selu karun. Kualidade eskola publika sai nu'udar preokupasaun komunidade sira. Kualidade eskola publika sei la rezolve iha tempu badak sei fo **impaktu longu prazu nian, ne'ebe sei hametin liu tan desigualdade iha sosiedade nia laran.**

Alem problema kualidade eskola publika, komunidade lamenta mos konaba **informasaun bolsu estudu ne'ebé la too iha distritu no sub distritu.** Ida ne'e difikulta estudante sira atu kompete iha selesaun bolsu estudu ne'ebé iha. Komunidade mos husu iha duni transparensia iha selesaun ba bolsu estudu, tanba bolsu estudu barak tuir komunidade nia haree iha KKN.

Governu ohin Ioron halao programa formasaun ba profesores sira atu hasae kualidade ensinu. Maibe, presiza iha mekanismu atu bele avalia nafatin sira nia koñesimentu.

Autoridade lokal no organizasaun sosiedade sivil iha distritu preokupa mos ba **nia oan sira ne'ebé la konsege hetan bolsu estudu tanba maski hakarak tebes** atu nia oan sira bele kontinua iha universidade maibe universidade hirak ne'ebé iha Timor laran mos karun tebtbes.

Komunidade husu atu parlamentu nasional no governu tau matan mos ba sira nia oan ne'ebé kontinua estudu iha Dili maibe barak liu laiha alojamentu, no **sira rasik tenki hela iha familia ne'ebé dala barak la fo kondisaun diak** hanesan estudante.

Rekomendasaun

- Husu ba Governu atu **tau matan kualidade eskola publika ne'ebé povu** maioria nia oan eskola ba.
- Governu aloka orsamentu sufisienti laos deit atu harii eskola foun maibe oinsa bele iha materias no be mos iha eskola
- Molok halao selesaun ba bolsu estudu governu tenki garante distribuisaun informasaun ba eskola sekundaria hotu atu iha oportunidade hanesan no governu tenki garante mos katak laiha KKN iha prosesu selesaun nia laran.
- **Kria mekanismu avaliaasaun ba profesores sira ne'ebé tuir tiha ona** formasaun profesores atu bele haree kualidade ensinu.

3. Agrikultura

Maoiria povu Timor-Leste moris husi agrikultura subsistensia tanba ne'e governu presiza hakbiit liu tan pratikas agrikula ne'ebe eziste no hasae liu sira nia kapasidade atu bele iha produtividade no kualidade produtu ne'ebé aas. Realidade hatudu katak desde husi ita nia beiala too ohin Ioron moris husi agrikultura. Husi tempu uluk too agora agrikultura mak hamoris maioria povu Timor-Leste. **Komunidade lamenta konaba praktika monokultura ne'ebé atu sai buras hanesan plantasaun tohu ne'ebé sei halo povu sai deit 'atan' iha plantasaun no hases agrikultura husi sira nia rain rasik.**

Programa fahe trator nu'udar inisiativa diak atu hasae produtividade, maibe makina deit la too tanba agrikultor presiza iha koñesimentu hanesan oinsa forma grupu, jestaun organizaun, oinsa rezolve konflitu entre membru grupu, manuntensaun ba tratores no tekniku konaba kuda rain nian. Komunidade iha area foho lolon husu ba governu atu tau matan mos ba sira nia agrikultura. Tratores sira bele uza iha rai tetuk maibe saida mak bele uza iha foho lolon.

Governu iha inisiativa atu sosa produtu husi komunidade liu husi programa Povu Kuda, Governu Sosa. Maibe realidade hatudu katak oinsa governu bele kria sistema ida atu agrikultor sira iha asesu atu faan sira nia produtu ba governu?

Iha degradasaun makas ba meiu ambiente iha Timor-Leste, tanba komunidade tesi ai no sunu rai. Pratika tesi ai no sunu rai sai tiha ona parte husi moris komunidade. Povu barak tesi ai atu uza hodi tein, halo uma, loke toos no faan. Komunidade mos lamenta atu oinsa sira labele tesi ai no sunu rai, maibe governu tenki fo alternativa ba tein no intensifikasiasaun ba toos sira ne'ebé eziste.

Rekomendasaun

- Ministeriu Agrikultura hasae kapasidade agrikultor sira nia liu husi treinamentu periodiku
- Hasae kapasidade estensionista iha kada suku atu iha koñesimentu konaba tekniku **agrikula ne'ebé relevante ba kada suku no jestaun organizasaun agrikultura ninian no estensionista ne'e bele asesivel ba grupu agrikultores iha suku laran.**
- Halo avaliaun ba utilizasaun tratores hodi haree saida mak lao diak no saida la lao hodi bele kontribui nafatin ba dezenvolvimentu agrikultor Timor-Leste.
- Governu presiza kria sistema ida atu agrikultor bele iha asesu ba programa Povu Kuda Governu Sosa no merkadu entre komunidade rasik.
- Governu presiza iha ona planu atu uza enerjia alternativa hodi bele uza ba **tein ne'ebe povu hotu iha kbiit atu bele uza no promote pratika tradisionais hodi proteje ita nia meiu ambiente.**
- **Investe barak iha praktika agrikultura sustentavel ne'ebé neineik-neineik** maibe beibeik hodi hamenus dependensia ba fundu petrolíferu.

4. Desiminasaun informasaun iha area petrolíferu

Diseminasaun informasaun relasiona ho fundu no atividade petrolíferu sai nu'udar preokupasaun komunidade iha 12 distritu; komunidade iha kraik la dun iha asesu ba informasaun hirak ne'e. Maibe, iha mos informasaun ne'ebé halo komunidade atu sai dependente liu ba riku soin minarai ninian. Komunidade iha Viqueque, Same no Suai husu atu sira bele iha informasaun naton atu bele partisipa mos iha prosesu dezenvolvimentu setor minarai ninian. Viqueque, Same no Suai **ne'ebé iha mina no gas no dala barak temi** sai nudar fatin ba atividade petrolíferu ninian, komunidade sira husu atu iha informasaun detallu konaba atividade petrolíferu nian hodi sira mos bele hetan benefisiu husi projetu hirak ne'e. *Supply Base* ne'ebé sei harii iha Suai sai mos nu'udar preokupasaun tanba too agora komunidade seidauk hatene atu harii iha ne'ebé? Oinsa komundade komundade bele hetan benefisiu husi *Supply Base* no planu saida mak governu iha atu prepara komunidade atu hetan benefisiu husi **programa ne'e.** Rai barak ne'ebé iha Suai besik tasi ibun, emprezariu sira husi Dili sosa hotu tiha ona?

Rekomendasaun

- Governu liu-liu Sekretariu Estadu Rekursu Naturais atu halo sosializasaun ho diak konaba planu implementasaun projetu no oinsa prepara komunidade atu bele mos hetan benefisiu masimu husi atividade petrolíferu.

5. Pakote Referendum

Autoridade lokal kestiona konaba pakote referendum tanba ne'e hatudu kapasidade governu atu ezekuta orsamentu ne'ebé konsentra liu ba iha oinsa gasta osan maibe la haree ba kualidade projetu.

Governu iha intensaun atu liu husi pakote referendum ne'e bele hasae kapasidade emprezariu lokal, maibe Autoridade lokal preokupa tebes ho kualidade emprezariu sira atu implementa projetu iha tempu badak nia laran. **Realidade hatudu katak iha emprezariu foun barak ne'ebé hetan benefisiu iha** kurtu prazu maibe sei la kontinua sai emprezariu liutiha pakote referendum.

Autoridade lokal kestiona tanba sa mak pakote referendum ne'e la haree ba prioridade lokal no involve Autoridade Lokal hodi garante kualidade implementasaun projetu?

Rekomendasau

- Atu utiliza Fundu Petrolíferu ba jerasaun ida agora no futuru tenki gasta osan hodi haree retornu iha longu prazu tanba ezekusaun orsamentu tenki bazeia ba aprovasaun orsamentu jeral estadu no tuir **kapasidade ne'ebé iha**.

6. Prezensa Parlamentu Nasionál no Governu Iha Distritu

Komunidade iha 12 distritu husu atu parlamentu nasionál no governu iha prezensa nafatin atu komunidade bele hatoo sira nia preokupasoens no rekomendasaoens. Komunidade mos kestiona konaba knaar fiskalizasaun parlamentu nasionál no oinsa parlamentu nasionál bele hodi komunidade nia lian mai iha uma fukun. Tuir komunidade katak membru parlamentu nasionál agora iha kareta ba ema idak-idak **no salariu ne'ebé aumenta** maibe prezensa membru parlamentu nasionál iha distritu sai menus liu tan.

Komunidade sinti katak iha falta boot atu komunidade hatoo sira nia hanoin ba parlamentu nasionál no parlamentu nasionál hatoo informasaun ba komunidade.

Rekomendasau

- **Parlamentu ne'ebé representa povu presiza** iha prezensa nafatin hodi rona povu ninia preokupasaun sira no responde ba perguntas no dúvida **ne'ebé** mak povu hakarak hatoo no sosializa nafatin informasaun ba povu konaba progresu dezenvolvimentu nasionál.
- Governu presiza iha prezensa nafatin liu-liu bainhira povu iha preokupasaun tanba administrasaun lokal rasik laiha kbiit atu hatan preokupasaun no rekomendasau husi komunidade.

II. Opiniaun ba Orsamentu Jeral Estadu 2010

LEI DO ORSAMENTU GERAL DO ESTADO 2010

Tuir proposta de lei Orsamentu Jeral Estadu 2010:

Total Reseitas : USD 1,481 Biliaun kompostu husi:

a. Rendimentu Domestika	: USD 87,3 Miliaun
b. Rendimentu Petroliferu(estimativa)	: USD 1,393 Biliaun

Previzaun Fundu Petroliferu:

Rendimentu Petroliferu 2009	: USD 1,253 Biliaun
Total Fundu petroliferu iha 30.09.2009	: USD 5,301 Biliaun

ALOKASAUN BA OJE 2010

RESEITAS :

1. Rendimentu Domestika	: USD 87,3 Miliaun
2. Transferensia Fundu Petroliferu	: USD 502 Miliaun
3. Doadores	: USD 129 Miliaun
<u>4. Changes in treasury cash-balances</u>	: USD 47,7 Miliaun
Total Alokasaun OJE 2010	: USD 766
Miliaun	

DESPEZA TUIR KATEGORIA:

1. Salariu no Vensimentu	: USD 97,7 Miliaun
2. Bens e Servisu	: USD 207,7 Miliaun
3. Kapital Minor	: USD 28,8 Miliaun
4. Kapital Dezenvolvimentu	: USD 216,8 Miliaun
<u>5. Transferensia e Pagamentus</u>	: USD 85,9 Miliaun
Totalidade	: USD 636,9 Miliaun

Kresimentu Ekonomiku

Kresimentu ekonomiku Timor-Leste sae too 12.8 % (2008) no 6-8 % (2009) **dalabarak governu uza nu'udar sasukat ba progressu dezenvolvimentu.** Koalia kresimentu ekonomiku iha Timor-Leste la dun iha sentidu tanba kresimentu sae ka tun depende ba utilizasaun osan husi fundu petroliferu ninian; Fundu Petroliferu mak sei kontinua sai fator determinantes ba dezenvolvimentu nasional. Tuir KKFP nia haree katak uza deit sasukat prosentazen kresimentu ekonomiku la suficiente atu haree realidade moris Timor-Leste ho razaun. 1. Kresimentu ekonomiku la haree konaba oinsa sukat mudansa moris povu maioria, 2. Kresimentu ekonomiku la sukat konaba masimizasaun **oportunidade servisu (15.000 traballador ne'ebe buka servisu tinan-tinan)**, 3. Kresimentu ekonomiku mos la koalia konaba produsaun lolos rai laran no **osan ne'ebe gasta ba sasan importada sira, no ikus liu kresimentu ekonomiku** la haree mos konaba oinsa atu Timor-Leste bele atinji auto-suficiente (*kemandirian*) tanba ne'e mos nu'udar objetivu husi dezenvolvimentu ekonomiku.

Too ohin Ioron Timor-Leste sei kontinua nu'udar NASAUN ida ne'ebé dependenti liu ba nia rikusoin minarai. Kompara ho NASAUN produtor minarai sira seluk, Timor-Leste nia dependensia as liu NASAUN produtor mina sira seluk, 98 % husi reseita estadu Timor-Leste mai husi Fundu Petroliferu. Tanba ekonomia Timor-Leste moris husi Fundu Petroliferu, importante liu mak laos haree deit husi kresimentu ekonomiku. **Tanba ne'e tuir KKFP nia hanoin katak importante liu mak haree konaba jestaun utilizasaun fundu petrolíferu ba ema kiak sira.**

Iha **fator importante tolú ne'ebe bele konsidera nu'udar sasukat ida atu haree** povu hetan benefisiu husi utilizasaun Fundu Petroliferu: (i) Edukasaun: Labarik sira ba eskola? Nia rasio aumenta? Osan sai obstaklu ba sira? Sira hetan hahan iha eskola?, (ii) Saúde: povu nia *life expectancy* aumenta? Malnultrisaun sai menus? Moras malaria no moras infesioza sira seluk sai menus? (iii) Seguransa aihan: produsaun domestika aumenta, diversifikasiasaun laos monokultura, asesu ba merkadu sai fasil?

Iha 9 Outobru 2009 UNDP hasai nia relatoriu konaba *Human Development Index ne'ebé haree husi life expectancy, edukasaun (Alfabetizasaun no inskrissaun eskolar no rendimentu ne'ebe produz ba dezenvolvimentu humanu.* Relatoriu ne'e bazeia ba dadus 2007 nian no Timor-Leste iha klasifikasiasaun 162 husi NASAUN 182. Timor-Leste nia klasifikasiasaun aat liu NASAUN kiak sira hanesan Haiti (149), Nepal (144) no Bangladesh (146). Maski dadus 2007 nian maibe la signifika katak utilizasaun husi Fundu Petroliferu nian fo benefisiu makas ba povu maoiria ne'ebe moris iha áreas rurais iha tinan 2008 no 2009 nia laran.

Rendimentu Sustentável Estimadu

KKFP apresia katak governu hato'o ninia proposta Orsamentu Jeral Estadu atu hasai osan husi Fundu Petroliferu iha Rendementu Sustentavel Estimadu (RSE) USD miloens 502 nia laran. Kalkulasaun RSE iha OJE 2009 **\$401 no kalkulasaun 2010 sa'e ba \$501,54(502m).** Ida akontese tamba iha mos mundansa iha Rikeza Petroliféru ka *Petroleum Wealth* husi \$13.595 Billiaun ba \$ 16.718 Billiaun.

Tuir livru Orsamentu Jeral Estadu no esplikasaun husi Autoridade Nasional do Petroleu hateten katak mudansa sira akontese tanba :

- ❖ Rezultadu renegosiasaun husi Operador Bayu Undan (Conoco Philips) ho komprador LNG(Liquefied Natural Gas) Tokyo Gas/Tokyo Electrics iha 2007 n0 2008 no mudansa **assumption ba folin mina ba rezultadu ne'ebé** espeta ba renegosiasaun ba periode 2009-2012 no presu LNG iha longu termu.
- ❖ Mudansa iha Projeksaun Presu mina; Iha OJE 2009 presu mina projekta \$60/brl ho tempu naruk presu mina iha \$40. Iha OJE 2010 projekta ba 60/brl ho projeksaun tempu naruk ho presu \$50/brl.

Alein mudansa sira ne'e iha mos buat seluk mak presiza haree mak discount rate 2.6% iha tempu ne'eba wainhira governu /ministeriu finansas halu kalkulasaun ne'e. Durante RSE diskonta hotu ho inflasaun mak iha Estadus Unidus. Tuir ami nia opiniaun katak wainhira governu hakarak transfere RSE

ba Orsamentu Jeral do Estadu presiza mos konsidera inflasaun **ne’ebé** iha Timor Leste .

Investimentu Universu

Tuir Relatoriu Mercer ne’ebé fo sai iha Novembru 2007, Investimentu Universu ho rendimentu fiksu (fixed rate-Bonds) bele la aproriadu tanba halo overspending iha Orsamentu Jeral Estadu liliu 2008-2009.

-Mudansa negativu ba investimentu finanseriu mundial

-Kalkulasaun RSE Iaiha konsiderasaun ba inflasaun **domestika (RSE ne’ebé)** mak iha inklui mos inflasaun 2 % iha Estadus Unidus) Lei Fundu Petroleu artigu 24.1.e **-Retornu real ne’ebé hetan husi investimentu fundu petroleu** hahu 2005 too 30 Setembru 2009 hamutuk USD 408 miloens. Desizaun hodi defini Rendimentu Sustentável Estimadu 3 % iha Lei Fundu Petroliferu sei bele akontese tempu longu prazu nia laran. Maibe, realidade katak Pratika utilizasaun fundu petroleum hatudu katak ita uza tiha ona kapital.

Mudansa Lei Fundu Petrolíferu

Planu Ministeriu Finansas iha Proposta Orsamentu Jeral Estadu 2010 sei halo mudansa Lei Fundu Petroleu iha fulan Jullu nia laran (pajina 169). Konsellu Konsultivu Fundu Petroliferu ho Komisaun C Parlamentu Nasional organiza Konferensia Internasional konaba Estratejia Investimentu Fundu Petroliferu **iha fulan Marsu 2009 iha Maubise ne’ebé hetan partisipasaun husi membru** Parlamentu Nasional husi bankada hotu-hotu, Ministeriu Finansas, Autoridade Banku no Pagamentu, Autoridade Nasional do Petroleu, EITI, organizasaun sosiedade sivil no parseiru dezenvolvimentu sira. Iha **konferensia ne’eba partisipante sira, inklui deputadu Parlamentu Nasional konkorda atu la muda Lei Fundu Petroliferu tanba lei ne’e sai koluna ba** finansiamentu sustentavel ba Timor-Leste no harii liu husi konsensu nasional ho Fundu Petroleu nia papel mak satisfaz jerasoens atuais no vindouras. Lei Fundu Petroliferu rasik iha fleksibilidade atu halo investimentu liu husi 10 %. **Fleksibilidade ne’e adekuadu iha momentu prezente.**

Governu iha fulan Juñu 2009 hahu adopta estratejia investimentu Fundu Petroliferu hodi halo diversifikasiasaun iha fleksibilidade 10 % hodi hili Bank for International Settlement (BIS) nu’udar jestor external ba USD Biloens 1. Osan hirak ne’e mak investi iha Bonds iha Dólar Austrália, Euro, Yen (Japaun) no UK.

Implementasaun estratéjia investimentu Fundu Petroliferu hodi halao diversifikasiasaun **iha fleksibilidade 10 % nu’udar estratéjia ne’ebé prudente.** Tuir KKFP katak sei sai sedu liu atu bele sukat retornu husi estratejia ida ne’e.

Razaun ne’ebé governu fó sai hodi halo mudansa Lei Fundu Petroliferu tanba retornu husi estratejia investimentu Fundu Petroliferu hodi investi iha Bonds Estadus Unidus bele la aproriadu. Timor-Leste nia moris sei kontinua depende nafatin ba Fundu Petroliferu iha dekada **hirak tuir mai. Tanba ne’e**

presiza iha konsensu nasional se governu hakarak muda duni Lei Fundu Petroliferu.

Dívidas Pública

Maski governu iha tinan ne'e foti osan iha RSE nia laran (USD miloens 502), maibe iha proposta OJE 2010 mos governu fo sai mos fontes orsamentu hanesan dívida. Seidauk klaru se governu atu deve iha tinan 2010 nia laran, maibe iha tendensia katak governu bele propoin fila fali orsamentu rektifikativu no Parlamentu Nasional rasik aprova tiha ona Lei Jestaun Finanseira ne'ebé fo dalan atu estadu Timor iha dívida.

Tuir livru orsamentu iha opsaun dívida balun ne'ebé governu konsidera hanesan : *commercial/private loans, bilateral loans, multilateral loans, concessional loans* no possibilidade atu deve husi EXIM Bank. Governu Portugal asina tiha ona Memorandum of Understanding (MOU) ne'ebé fasilita atu dezenvolve dívida. Projetu ne'ebé sei halao sei la sai parte husi Orsamentu Jeral Estadu (pajina 51). Maski nune'e seidauk iha desizaun rumo. Governu fo sai katak sei uza dívida ne'e ba projetu infrastrutura ho montante USD biloens 3 no sei selu iha tinan balun nia laran.

Lei Fundu Petroliferu artigu 20 bandu atu uza Fundu Petroliferu hanesan **garante ida atu halo dívida pública.** **Oinsa bele selu fila fali dívida ne'e no nia konsekuensia** sai nu'udar preokupasaun Konsellu Konsultivu Fundu Petroliferu. Timor-Leste seidauk iha kapasidade atu selu fila fali dívida la ho Fundu Petroliferu. Se ita haree deit husi reseita doméstika iha USD miloens 69.49 (2008), 90.29 (2009) no 87.19 (2010). Reseita doméstika ne'e rasik mos barak liu mai husi Fundu Petroliferu hanesan tasa, faan foz no eletrisidade. **Oinsa bele selu fila fali dívida ne'e laho Fundu Petroliferu?** Tuir Konsellu Konsultivu Fundu Petroliferu Timor-Leste seidauk iha kapasidade atu selu fila fali dívida. Se Parlamentu Nasional aprova dívida pública iha futuru, Timor-Leste sei repete erro husi esperiensia nasaun ho tusan no possibilidade atu monu iha malisan riku soin.

Importante liu mak estadu tenki garante katak utilizasaun Fundu Petroliferu **tenki liu husi jestaun ida ne'ebé prudente atu jerasoens atuaus no vindouras** bele hetan benefisiu. Utilizasaun Fundu Petroliferu desde orsamentu jeral estadu 2006-2009 efetivu ona liu husi kualidade instituisaun atu garante **jestau ida ne'ebé prudente** (ez. papél fiskalizasaun husi Parlamentu Nasional efetivu ona?), nível korupsaun no dependensia ba produtu importada? Setor privadu sai independenti husi Fundu Petroliferu ka kontinua sai parasitu?

Kapasidade Ezekusaun

Bazeia ba relatorio II trimestre ne'ebé KKFP iha, kapasidade ezekusaun iha item kapital dezenvolvimentu: ezekusaun ministeriu saúde hatudu katak osan dezenvolvimentu kapital ho montante miliaun US\$7,479.0 so bele ezekuta deit 0,04% (ka rihun atus US\$307,0). Ezekusaun ministeriu edukasaun atinzi deit rihun USD 889.0 (7 %) husi miliaun USD 12,795. Ministeriu infrastrutura husi USD miloens 117.933 ba kategoria kapital dezenvolvimentu iha tinan 2009 ezekuta deit USD miloens 4,186 (3,5 %). Ministeriu

Agrikultura iha ezekusaun diak iha kapital minor **ho montante bo'ot hamutuk** miliaun US\$15,945.0 tamba hodi sosa tratores. Maibe kategoria ba kapital dezenvolvimentu ho montante osan hamutuk milaiun US\$6,411.0 so ezekuta deit **4,4% (rihun atus US\$284.0)**. Signifika katak, kategoria ida ne'e hodi bele suporta fasilidades fiziku ba produsaun lokal labele atinzi ho diak. Tuir KKFP katak laiha **razaun ba ministeriu ne'ebé mak ezekuta orsamentu sei fraku** la presiza aumenta tan nia orsamentu atu garante utilizasaun fundu petolíferu ho prudente ba jerasoens atuais no vindouras.

Kapital dezenvolvimentu nu'udar item ida ne'ebé povu maioria bele hetan benefisiu barak, maibe tanba problema kapasidade ezekusaun osan barak husi infrastrutura nia aloka tiha ona ba pakote referendum. Tuir KKFP nia haree katak práтика pakote **referendum nian nu'udar presedenti ida ne'ebe la diak no** sei haburas pratika jestau ida ne'ebe la prudenti utilizasaun rikusoin ida ne'ebé la renovavel no sei sai presedente a'at ida ba ezekusaun orsamentu tuir mai ne'ebé Lei Jestaun Finaseira rasik loke fo kbiit atu iha fundu espesial.

Kapasidade ezekusaun laos deit haree husi relatoriu ezekusaun orsamentu **maibe oinsa relatoriu ne'e indika mos katak metas, objetivu no target ne'ebé** tau iha livru orsamentu atinji tiha ona ka seidauk?

Rekomendasau

1. **KKFP konkorda ho proposta OJE ne'ebé governu hakarak hasai osan** husi Fundu Petrolíferu iha Rendimentu Sustentavel Estimadu nia laran (USD miloens 502)
2. Husu ba Parlamentu Nasionál (komisaun C) atu husu esplikasaun husi governu konaba revizaun Lei Fundu Petrolíferu no Parlamentu Parlamentu Nasionál akompaña nafatin ho detallu ba planu revizaun **ne'e tanba Fundu Petrolíferu nu'udar rekursu vital ba dezenvolvimentu** nacionál iha dekada hirak tuir mai.
3. Husu ba Parlamentu Nasionál atu halao nia funsaun fiskalizador hodi **bele garante kualidade ezekusaun ne'ebé tuir planu no fo benefisiu** barak liu ba povu maioria iha rurais.

Dili, 6 Novembru 2009

Konsellu Konsultivu Fundu Petrolíferu

Francisco Vasconcelos
Koordenador

Nuno Rodrigues
Vise